

OPĆINSKI SUD U ŽIVINICAMA

PROGRAM

**OBUKE SUDSKIH PRIPRAVNIKA I PRIPRAVNIKA-VOLONTERA U
OPĆINSKOM SUDU U ŽIVINICAMA**

Živinice, decembar 2006. godine

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON

OPĆINSKI SUD U ŽIVINICAMA

Broj: 033-0-Su-06-001155-1

Živinice, 25.12.2006. godine

Na osnovu člana 37. stav 2. Zakona o državnoj službi u Federaciji BiH („Službene novine Federacije BiH“, broj 29/03, 23/04, 39/04, 54/04, 67/05 i 8/06), člana 45. i 46. Zakona o sudovima Federacije BiH („Službene novine Federacije BiH“, broj 53/05) i člana 19b Pravilnik o unutrašnjoj organizaciji i sistematizaciji u Općinskom sudu Živinice (broj 033-0-Su-06-000305 od 14.04.2006. godine), donosim slijedeći:

PROGRAM

OBUKE SUDSKIH PRIPRAVNIKA I PRIPRAVNIKA-VOLONTERA U OPĆINSKOM SUDU U ŽIVINICAMA

I

Ciljevi programa

Ovim Programom utvrđuju se način, postupak i sadržina stručnog osposobljavanja diplomiranih pravnika, sudskih pripravnika i pripravnika-volontera u Općinskom sudu u Živinicama (u daljem tekstu: Sud), radi sticanja prakse u svim oblastima sudskog rada i uslova za polaganje pravosudnog ispita.

II

Sadržina obuke

Stručno osposobljavanje pripravnika i volontera obuhvata obuku kroz praktičan rad na stručnim pravnim poslovima, upoznavanje sa sadržinom i načinom vođenja poslova u Sudu i osposobljavanje za samostalnu primjenu prava.

Sadržina obuke sudskih pripravnika i pripravnika volontera se iskazuje kroz:

- upoznavanje sa nosiocima sudijskih funkcija i sudskim službenicima,
- upoznavanje sa Zakonom o sudovima FBiH,
- upoznavanje sa Pravilnikom o sudskom poslovanju, unutrašnjom organizacijom i radom Suda,
- rad u prijemnoj kancelariji,
- rad u sudskoj pisarnici,
- upoznavanje sa sadržinom sudskih predmeta i praćenju suđenja,
- referisanje sudiji o uočenim pravnim problemima i spornim činjenicama u predmetima čijem suđenju prisustvuju i
- izradu nacрта sudskih odluka.

III

Trajanje obuke

Obuka traje za sve vrijeme trajanja pripravničkog staža koji se određuje Zakonom, a najduže na period od dvije godine.

IV

Način odvijanja obuke

U cilju ravnomjernog sticanja prakse u svim oblastima sudskog rada, pripravnici i volonteri se u toku trajanja pripravničkog, odnosno volonterskog rada postepeno raspoređuju na rad u svim sudskim odeljenjima, odeljenju sudske uprave (pisarnica i opći i računovodstveno materijalni poslovi), prekršajnom odeljenju i zemljišno-knjižnom uredu.

Obuka pripravnika i volontera se odvija kroz slijedeće faze:

a) Na poslovima sudske uprave 45 dana, od čega:

- u prijemnoj kancelariji 15 dana,
- u pisarnici suda 15 dana,
- u sudskoj upravi 15 dana.

b) Rad u sudskim odeljenjima:

- Građansko odeljenje 7 mjeseci,
od čega:
 - Parnični referat 3 mjeseca,
 - Vanparnični referat 2 mjeseca,
 - Izvršni referat 2 mjeseca.
- Krivično odeljenje 5 mjeseci,
- Prekršajno odeljenje 2 mjeseca,
- Zemljišno-knjižni ured 45 dana.

Sudski pripravnik i pripravnik volonter imaju obavezu da prisustvuju predavanjima i seminarima u vrijeme određeno od strane sudije zaduženog za sprovođenje programa obuke, kao i drugim eventualnim oblicima usavršavanja.

Predsjednik suda može u slučaju ukazane potrebe odrediti da pripravnik i pripravnik-volonter radi u dužem ili kraćem vremenu na određenim poslovima.

V

Nosioci obuke

Predsjednik Suda (u daljem tekstu: Predsjednik) stara se o organizaciji i postupku obuke sudskih pripravnika i pripravnika volontera.

Sudija kod koga je pripravnik raspoređen (u daljem tekstu: sudija-mentor) sprovodi obuku u sudnici, u okviru sudskog odeljenja u kome je raspoređen prema godišnjem rasporedu poslova.

Sudski službenici upoznaju pripravnike i volontere sa poslovima svog djelokruga rada.

VI

Dužnosti i prava sudija

Sudija-mentor je dužan da kroz davanje objašnjenja, smjernica i uputstava realizuje praktičnu obuku pripravnika i volontera, da omogući sudskom pripravniku i pripravniku-volonteru praćenje toka suđenja i neposredan uvid u spise predmeta čijem suđenju prisustvuje, da kontroliše vođenje pripravničkog dnevnika i da njegovu vjerodostojnost potvrđuje svojim potpisom.

Sudija-mentor je dužan da po završetku osposobljavanja pripravnika i volontera, dostavi predsjedniku suda mišljenje o njihovom radu, stečenom znanju, ponašanju i cjelokupnom angažovanju.

Pri davanju mišljenja ocjene su: "ne zadovoljava", "zadovoljava", "ističe se", "naročito se ističe".

Za dato mišljenje sudija odgovara predsjedniku suda.

VII

Dužnosti i prava sudskih pripravnika i pripravnika-volontera

Svaki sudski pripravnik i pripravnik-volonter je dužan da se pridržava ovog Programa.

Za vrijeme trajanja osposobljavanja, sudski pripravnik i pripravnik-volonter je dužan da vodi dnevnik rada, svakodnevno.

Pripravnički dnevnik treba da sadrži podatke o dnevnim aktivnostima, urađenoj pošti, urađenim nacrtima odluka, radu sa sudijom na određenim predmetima ili drugim poslovima poučavanja od strane sudije o pojedinim institutima.

Za vrijeme trajanja osposobljavanja, pripravnik i volonter je dužan da savjesno i marljivo učestvuje u realizaciji Programa, da bude tačan, vrijedan, da ispunjava zahtjeve sudije koji se odnose na dnevni posao i druge vidove osposobljavanja, da poštuje Pravilnik o sudskom poslovanju, red i pravila ponašanja u sudskoj zgradi i sudnicama, da dolazi na posao u garderobi adekvatnoj društvenom značaju i ugledu posla koji obavlja, da se sa uvažavanjem i dužnim poštovanjem ophodi prema sudijama, sudskim službenicima, drugim pripravnicima i učesnicima u postupku, da preuzme inicijativu u radu i sticanju znanja.

Pravo je pripravnika i volontera da odbije izvršenje posla za koji nije prethodno obučen, da odbije izvršenje svakog posla kojim se omalovažava njegova funkcija, da uloži pritužbu predsjedniku ili sekretaru suda na nedovoljno angažovanje, nepružanje instrukcija i pomoći u realizaciji praktične obuke od strane sudija i sudskih službenika.

VIII

Završne odredbe

Nakon provedenog pripravničkog-volonterskog staža predsjednik Općinskog suda izdaje pripravniku-volonteru potvrdu da je pripravnički-volonterski staž proveo u skladu sa ovim Programom.

Ovaj Program stupa na snagu osmog dana od dana objavljivanja na oglasnoj tabli Općinskog suda u Živinicama.

PREDSJEDNIK SUDA

Muhamed Tulumović